

POLIZI OPERAZIOA. Segurtasuna argudiatu du

Balza: «Ertzaintzak zuzenean eskura izan behar du Frantzian atzemandako materiala»

Erredakzioa | DONOSTIA

Larunbatean Serres-Casteten (Biarno) ustez ETak erabilitako etxe batean atzemandako materiala Ertzaintzak modu zuzenean eskura izatea eskatu zuen atzo Javier Balza Herriazango sailburuak. «Berez beharrezkoa litzateke» Ertzaintza bertan egotea, baina «bonba-tranpak direnean eta ertzainen kontra atentatuak egiteko bereziki prestatzen diren tresnak direnean, behar hori bikoiztu egiten da», esan zuen Radio Euskadiri eskainitako elkarrizketan.

Espainiako Barne Ministerio-arekin dituen harremanak az-

ken hilabeteetan «ondo» joan direla baieztatu zuen Barne sailburuak. Baina, Espainiatik kanpoko polizi operazioak direnean, «badirudi Espainiak oraindik nolabaiteko kezka edo erresumina duela». Balzaren aburuz, kontua ez da Europan ordezkariak politikoa izatea, «segurtasuna» baizik.

Atzemandako dinamita eta kloratita Sougesko (Bordeletik gertu) base militarera eraman zuten suntsitzeko. Frantziako Poliziako iturrien arabera, etxe horretan aurkitutako lehergai-luak Tomas Elorriaga eta Eneko Gogeaskoetxea ustezko eta-kideek prestatzen zituzten.

BILBOKO UDALA. Taldeak lau saio dauzka hitzartuta

Azkunak dio Takolo, Pirritx eta Porrotxek ez dutela parte hartuko antzerki jaialdian

H. Unzueta | BILBO

Iñaki Azkuna Bilboko alkateak atzo esan zuen Takolo, Pirritx eta Porrotx pailazo taldeak ez duela datorren hilean Bilbon izango den Haur Antzerki Jaialdian parte hartuko. Aiora Zulaiak (Pirritx) taldekide eta Batasuneko zinegotziak Froilan Elespe Lasarte-Oriako zinegotzi sozialistaren hilketa gaitzetsi ez zuelako hartu duela neurria adierazi zuen Bilboko alkateak.

Azkunak Aureliano Valle eskulturgilearen omenezko ekitaldian egin zituen adierazpe-

nok atzo arratsaldean. Aurretik, PSEko eledun Dimas Sañudok «deitoratu» egin zuen Udalak Takolo, Pirritx eta Porrotx kontratatu izana. Hari beretik, Antonio Basagoiti PPko eledunak «lotsagarritzat» jo zuen pailazo taldeak Bilboko jaialdian ekaritzea eta Azkunari «arduragabekeria» hori zuzentzeko eskatu zion.

Joxe Mari Agirretxe 'Takolo' harrituta agertu zen informazioaren berri izatean, eta otsailaren 16 eta 17rako Bilborock aretoan lau saio hitzartuta dituztela baieztatu zion EGUNKARIA-ri.

LABURREAN

PPren Kongresuan «nora ez antidemokratikoan» ibili dela egotzi dio Anasagastik Aznarri



LUIS TEJIDO / EFE
Iñaki Anasagasti.

Iñaki Anasagasti EAJko diputatuak PPren Kongresuan «nora ez antidemokratikoan» ibiltzea egotzi zion atzo Jose Maria Aznar Espainiako gobernuburuari. «Iparreko abertzale arriskutsuen kontra borrokan aritzen den nazionalista espainiar onaren diskurtsoa egiteko erabiltzen du euskal auzia. ETarekin parekatuz, politikoki suntsitu nahi ditu abertzaleak», adierazi zuen Espainiako Kongresuko bozeramaile jeltzaleak. Bere ustez, Aznarrek ez

ditu onartzen azken hauteskundeetako emaitzak. «Egia ofiziala eraikitzen du, eta horren gainean gaitzespenaren diskurtsoa», esan zuen.

Reyk Donostiako udaletxeko planoak zituela diote Poliziako iturriek

Joan zen astean Landetan atxilotutako Alberto Rey ustezko etakideak Donostiako udaletxeko planoak zituela adierazi dute Espainiako Poliziako iturriek. Bestalde, Rey atxilotu zutenean ihes egin zuen ustezko etakidearen autoa aurkitu zuten atzo, Mont de Marsan-en. Autoa Poliziaren egoitzetara eraman zuten. Iheslariak auto istripua izan zuen Rey atxilotu zuten lekutik 20 kilometroa.

Garzonek auzipetzea jakinarazi die Carrasco, Vicente, Etxezarreta, Makazaga eta Jauregiri

Auzitegi Nazionaleko epaile Baltasar Garzonek auzipetzea jakinarazi zien atzo Ibon Etxezarreta, Luis Mari Carrasco, Santiago Vicente, Patxi Xabier Makazaga eta Oskarbi Jauregi preso-ek, ustez Mikel Uribe ertzainaren hilketan parte hartzeagatik. Auzipetuek uko egin zioten epailearen aurrean deklaratzeari. Frantzian preso dagoen Xabier Garcia Gaztelu ere auzipetu du Garzonek.

Desobedientzia zibilari buruzko mahai-inguruak izango dira otsailaren 5ean eta 6an Orion

Orioko Herri Ekimenak desobedientzia zibilari buruzko mahai-inguruak antolatu ditu otsailaren 5erako eta 6rako. Lehenengoan, desobedientzia zibilaren inguruan lan egiten duten gizarteko eragilean ordezkariak izango dira, hala nola Zuzen Ekintza Taldea, Zarautzek Intsumisioa, Hemen eta Munduan eta Esait. Bigarren egunean, berriz, desobedientzia zibilean lantzen diharduten Mario Zubiaga, Patxi Asparrren eta Luix Barinagarrementeriak hartuko dute parte. Mahai-inguruak arratsaldeko 19:30ean izango dira, Orioko Kultur Etxean.

DESOBEDIENTZIA

Nortasun agiriak biltzeko ekitaldia egingo dute larunbatean Donostian

Garbiñe Olaizola | DONOSTIA

Burujabetzaren aldeko desobedientzia zibila bultzatzen duten desobedientzialariek 100etik 1.000ra kanpainari ekingo diote datorren larunbatean Donostian. Orain arte Frantziako eta Espainiako 110 nortasun agiri jaso dituzte, eta 1.000ra iristea dute helburu. Kanpainaren hasierako ekitaldia 12:00etan hasiko da, Bulebarrean. Elkarretaratze bat egin ostean, nortasun agiriak eman ahal izango dira.

Hilaren 30ean, Gandhiren heriotzaren 55. urteurrena izango dute gogoan ekitaldian. Izan ere, desobedientzialarien ustez, Gandhi «eredugarria» da desobedientziaren aldeko mugimenduarentzat, «burujabetza zuelako helburu». Gogoratu zuten, Gandhik «hindu eta musulmanei Erresuma Batuak ezarritako nortasun agiriak erre zituen publikoki. Guk Espainia eta Frantziakoak bildu eta NBera bidaliko ditugu».

Ekimenak Lizarra-Garaziren barruan zeuden alderdi gehien onespina du, eta desobedientzia arloan lanean diharduten hainbat eragilek bat egin dute. Euskal gizarteak desobedientzian itxaropena baduela diote desobedientzialariek, gatazka politikoa konpontzeko onuragarria izango delakoan.

Ekimenaren aurkezpenean KEM mugimendu antimilitaristako kide bat izan zen. «Interesgarritzat» jo zuen «indarkeriarik gabeko desobedientzia zibila, autodeterminazioa helburua izanik, hain militarizatua dagoen gatazka desmilitarizatze».



Gipuzkoako Foru Aldundia
Diputación Foral de Gipuzkoa
Ogasun eta Finantza Departamentua

Aitorpen telematikoen aurkezpena

Epea: 2002ko otsailaren 20ra arte.

Zergadunaren arreta zerbitzua

* Telefonoak (08:30-14:30)

* Ereduak 190, 345, 180, 193 y 194 → 943 48 30 40

* Aurkezpen telematikoa → 943 48 34 58

* Internet: www.gipuzkoa.net/ogasuna

ZERGA AITORPENEN AURKEZPEN TELEMATIKOA

- Gipuzkoako Foru Ogasunaren webgunean eskura jarri dira ondoko aitorpenak interneten bidez aurkeztea errazten duten laguntza programak:

190	Lanaren, jardueraren ekonomikoen eta sarien etekinei egindako atxikipenen urteko laburpena
345	BGA-Eak eta pentsio planak. Bazkide edo partaideen eta kontribuzio edo ekarpenen urteko aitorpena
180	Hiri ondasun higiezinak errentan emateagatik lortutako etekinei egindako atxikipenen urteko laburpena
193 194	Kapital higikorren etekinei aplikatutako atxikipenen urteko laburpena: dibidenduak, interesak, aktibo finantzarioak eskualdatu, amortizatu, berreskuratu, trukatu edo bihurtzeagatik lortutako errentak, etab.

- Aholkularitza zerbitzuek, sozietateek eta enpresari edo profesional autonomoek erabiltzeko prozedura da.
- Bestelako tramiterik gabe: aitorpena transmititzean lortzen den frogagiria gordetzea aski da.